

proveditor scrisse, di 5, che a di 7 monteria a cavallo, nè voleva andar la matina per esser el di di Pasqua.

Di Alexandria lettere zercha quelle novità dil soldam, la morte dil qual sarà notada più avanti diffusamente; *solum* qui noterò uno capitolo di una lettera scritta in Alexandria per Alvixe Mora a di 26 novembrio, lo qual fo lecto ozi in pregadi.

A di 24 del passato significai quello era ocorso del soldam piccolo, et come el fo morto, et in suo luogo facto el fradelo de sua madre, zovene de anni 30 che apena sa parlar rabesco et turchesco per esser circa anni 10 vene *cum* uno pezo di peliza a le spale et uno par de panche in piede nel paese, al qual la fortuna mostrò tanta prosperità che non solamente l'ha exaltato a tanto grado che anche, poi intrato in signoria, è sta trovato certa scosagna *cum* sarafi 8000 e altre casende *cum* grande valsente de robe, cossa che a niuno altro ha promesso essa fortuna, in modo che contadi e oro et altro che l'ha manzato de le cosse de' molti grandi che era atorno el soldaneto morto, el se atrova molto forte; et oltra di questo essendo morto Cartabei signor de Damasco, l'è venuto nova come el diodar fuora ussito *cum* favor et zente de Aliduli era in asedio atorno Alepo, et che è sta destinà Isubech armiragio grande et uno Tenibet Zumeli che sono i do vechioni, a cui benemerito veria el soldanadego, *cum* altri do armiragi de mille lanze *cum* mamaluchi mille per andar a defension di quel luogo, et cussi *infallanter* per tutta la settimana che intra, volantissime deno cavalehar; *adeo* che *pro nunc* el prefato soldam senza dubito de alguno roman insedià *cum* grande obedientia. Et andando i do più vecchi a quelle bande, Idio sa quello de essi seguirà. L'ambasador di Cypro à auto expedition, et doveva partir de zorno in zorno del Cajero, et benchè avanti doveria esser posta la morte dil solda, *mtamen* hessendo questa scritta sarà leta prima.

Et in questo zorno, da poi disnar, domente si legge le lettere, se reduce el principe con la Signoria, li savii et li cai dil consejo di X in cheba, et consultato il modo di trovar danari per dar li pro e le decime al monte nuovo se die meter, et terminato far doman consejo di X. *Etiam* fo parlato in la materia di domino Marquardo si tratava nel consejo di X; et udito sier Zorzi Pisani dottor, era di pregadi, stato orator al re di romani, el principe se partì et fono electi do savii da terraferma in luogo di sier Hironimo Orìo, era andato prima a Bergamo, et di sier Zorzi Corner el kav., havea compido: et rimaseno sier Alvise Venier fo savio da terraferma et sier Paulo Pixani el cavalier fo savio da terraferma, ve-

niva prima di Bergamo, et non era ancor zonto, et tutti do introno.

Ancora fo messo parte di scriver al consolo nostro a Napoli, et fono in opinion tutti tre li ordeni de li savii di collegio, che dovesse far comandamento a la nave, patron sier Sabastiam Marzello, era lì, che debi vegnir a Corfù a requisition di la Signoria nostra et soldo, con conditioni, stagando mexi 6 a' nostri servicii, debi scontar la mità dil debito de li ducati . . . li fo prestadi per caxom di dita nave de li danari di la Signoria nostra, come per suo nome li fratelli si havia oferite, et di tuto el consejo fo presa la dita parte et expedite le lettere.

*Item*, fo posto per li consejeri, savii grandi et di terraferma, di scriver a l' orator a Roma per quel beneficio di Monopoli fo conferido per collegio a uno fiol di Luca di Lanti orator pisano, el qual in questi zorni erali morta la moglie e rimasto con 10 fioli, et quello havia dito beneficio era suo cugnato, e fu presa.

*Item*, fo posto per 4 de nui savii ai ordeni, et fo opinion mia, di mandar 2000 stera di mejo a Cataro, 20 miere de biscoto, bote 10 di asedo et 6 de ojo per la munition di quella terra et castelo, nè se possi tochar soto la pena di furanti. *Item*, mandarli ducati 200 di raxon di la fabricha per scarpapar certo monte; *etiam* mandarli ducati 40 per far la fortification di uno loco da star stratioti et uno ponte, come era consejato per lettere di quel retor. *Item*, fusse fatto cavar il fosso, et che 'l retor dovesse far la mostra di quelli fanti et cassar tutti paesani, nè quelli potesseno haver soldo altri che taliani, et dovesse poner le garde, e fu presa.

*Item*, fo messo parte, et presa per i savii dil consejo et di terra ferma, di scansar molte spexe de officii in questa terra; et che fusse comesso ai tre proveditori sopra la camera d'imprestedì, dovesseno veder et inquerir et vegnir con l'horo opinion in collegio, et che tutti li savii potesseno vegnir con dite opinion al consejo; et parloe sier Hironimo Cappello proveditor per le camere, non per contradir, ma disse venivano cussi poi era retornadi, et narò molti desordini seguite per le nostre terre per li scrivani di le camere, li qual li haveva intromessi et metaria, etc. Non li fu risposto nulla.

A di 8 zener in collegio. Fo aldito Zorzi Dragon, deputato andar capo a far conzar le barze a Puola, qual si scusoe per la morte di Hironimo Bondi con el qual havia da far, *tamen* fo exortato andasse, et cussi *post multa* fu contento di andar, etc.

Vene l' orator di Urbin dicendo haver lettere di